

HOLY SEE PRESS OFFICE  
OFICINA DE PRENSA DE LA SANTA SEDE



BUREAU DE PRESSE DU SAINT-SIEGE  
PRESSEAMT DES HEILIGEN STUHLS

# **BOLLETTINO**

SALA STAMPA DELLA SANTA SEDE

N. 0353

Lunedì 18.06.2001

## **LETTERA DEL SANTO PADRE ALL'INVIATO SPECIALE ALLA CELEBRAZIONE DEL XVI CENTENARIO DELLA MORTE DI SAN VIGILIO, VESCOVO, PATRONO DELL'ARCIDIOCESI DI TRENTO**

LETTERA DEL SANTO PADRE ALL'INVIATO SPECIALE ALLA CELEBRAZIONE DEL XVI CENTENARIO DELLA MORTE DI SAN VIGILIO, VESCOVO, PATRONO DELL'ARCIDIOCESI DI TRENTO

In data 24 marzo 2001, il Santo Padre ha nominato l'Em.mo Card. Marco Cé, Patriarca di Venezia, Suo Inviato Speciale alla celebrazione del XVI centenario della morte di San Vigilio, Vescovo, Patrono dell'Arcidiocesi di Trento, in programma a Trento il 26 giugno prossimo.

Il Cardinale sarà accompagnato da una Missione composta da due sacerdoti dell'Arcidiocesi di Trento:

- Rev.do Mons. Valentino Felicetti, Parroco, Delegato Vescovile per Rovereto;
- Rev.do Sac. Prof. Remo Vanzetta, Parroco, Delegato Vescovile per Pergine.

Pubblichiamo di seguito la Lettera di Giovanni Paolo II al Suo Inviato, Em.mo Card. Marco Cé:

Venerabili Fratri Nostro

**MARCO S.R.E. Cardinali CÉ**

Patriarchae Venetiarum

Meritum solet catholica Ecclesia cultum Sanctis cunctis tribuere iisque potissimum qui, bene de Ecclesia meriti, clara virtutum exhibuerunt exempla quique flagranti permoti studio penitus se Deo consecrarunt hominumque salutem. Inter hos quidem annumerandus est procul dubio sanctus Vigilius, a cuius obitu XVI iam transierunt saecula. Tertius ipse Tridentinus Episcopus aedificare Ecclesiam sibi commissam, monente sancto Ambrosio (cfr *Ep.* LXII), studuit operamque potissimum dedit ut Evangelii nuntius in gentilium plagas diffunderetur.

Nuper comperimus huius caelitum XVI centenariam commemorationem Tridenti die XXVI mensis Iunii congruenti

cum sollemnitate celebratum iri. Illius namque urbis insignis in cathedrali templo exuviae martyrum sociorum ipsiusque reliquiae reperiuntur. Inibi igitur eventus hic suum obtinebit fastigium. Nonnulli quoque arcessentur Praesules qui eiusdem sancti servant memoriam quive Tridentinam Sedem quadam necessitudine attingunt.

Quapropter libentes volentesque postulatis subvenire volumus Venerabilis Fratris Aloisii Bressan, Tridentini Archiepiscopi, qui, eventus ille quo magnificentius ageretur, a Nobis petiit ut eminentem quempiam Praesulem primas partes inibi acturum mitteremus. Ad te autem, Venerabilis Frater Noster, illi Sedi proximum, cogitationem convertimus, quem omnino parem iudicamus huic officio sustinendo. Itaque, magnam aestimationem Nostram significantes, te *Missum Extraordinarium* ad illum sacrum ritum agendum renuntiamus et constituimus.

Universis quidem huius commemorationis participibus cunctisque adstantibus secundam benignamque Nostram voluntatem ostendes, partes Nostras ages Nostraque auctoritate salutaria verba enuntiabis. Ipsius sancti Vigili demum totam in communitatem ecclesiam devocamus patrocinium, qui supernis beneficiis eosdem iuvare dignetur, ut inibi fideles sine cunctatione vel tarditate, maiorum probandas consuetudines sectantes, firmissime teneant fidei pietatisque cursum. Benedictionem demum Nostram Apostolicam Nostro nomine impertias velimus, quae sit superni subsidii firmamentum et animorum renovationis incitamentum.

Ex Aedibus Vaticanis, die XX mensis Maii, anno Domini MMI, Pontificatus Nostri tertio et vicesimo.

IOANNES PAULUS II

[01027-07.02] [Testo originale: Latino]

---